

## **13 lagi positif, 2 kluster baru**

**Malaysiakini**

**09 Ogos 2020**

**B Nantha Kumar**

Setakat tengah hari tadi, 13 lagi individu dikesan positif Covid-19 menjadikan jumlah keseluruhan kes wabak itu yang pernah direkodkan di Malaysia adalah 9,083.

Daripada 13 kes baru yang dilaporkan, sembilan merupakan kes import melibatkan lima warganegara Malaysia dan empat bukan warganegara.

Kes import itu melibatkan individu yang pulang dari China (2 kes), India (2 kes), Jepun (2 kes), Ireland (1 kes), Indonesia, Yaman (1 kes). Kesemua kes dikesan di Semenanjung kecuali individu pulang dari Yaman (dikesan di Sarawak).

Baki kesemua empat kes baru penularan di dalam negara adalah di kalangan warganegara Malaysia.

Daripada empat penularan kes baru itu, tiga dikesan di Pulau Pinang dengan dua

daripadanya adalah dari Kluster PUI Sivagangga, dan satu kes daripada Kluster Kurau.

Satu kes penularan dalam negara dikesan di Putrajaya, iaitu daripada Kluster Meranti.

Kluster Kurau (di Pulau Pinang dan Perak) dan Kluster Meranti (di Kuala Lumpur, Selangor dan Putrajaya) merupakan kluster baru. Ini menjadikan kluster aktif kini adalah sebanyak 25.

Mengambil kira 8,784 kes pulih termasuk sembilan yang baru, jumlah kes aktif dengan kebolehhjangkitan Covid-19 adalah 174 kes.

Hanya satu kes sedang dirawat di Unit Rawatan Rapi (ICU) tanpa memerlukan bantuan pernafasan. Tiada kematian baru dilaporkan (kekal 125 kes).

### **Kluster baru**

Menurut Noor Hisham, kes pertama Kluster Kurau merupakan kes positif Covid-19 yang telah dilaporkan pada 7 Ogos.

Kes kedua kluster ini merupakan abang ipar kepada kes pertama yang telah

dikesan hasil aktiviti pengesanan kes secara aktif dan saringan kontak rapat.

Sejumlah 115 individu kontak rapat telah disaring dan mendapati 106 negatif, sementara sembilan masih menunggu keputusan.

Punca Kluster Meranti pula kini masih dalam siasatan.

Kluster ini mula dikesan apabila kes ke-9083, iaitu seorang petugas kesihatan dikesan positif pada 8 Ogos.

Individu itu merupakan kontak kepada kes ke-8968, iaitu kes yang telah dikesan hasil daripada saringan pra pembedahan (kes ini telah dilaporkan pada 31 Julai).

Setelah disiasat, kes ke-8968 didapati pernah mempunyai sejarah mendapatkan rawatan di fasiliti kesihatan sama.

Saringan kontak rapat dan aktiviti pengesanan kes secara aktif sedang dijalankan dan setakat ini 15 individu telah disaring.

**Copyright © 1999-2012 Mkini Dotcom Sdn. Bhd**

Source: <https://www.malaysiakini.com/news/537983>